

Stimats preschaints, chars uffants, chara cumpagnia da festa

In nom da la Società d'Ütil public as duna il bivgnaint a quista festa da taimpra tuot speciala:

- in quist lö cun culissa magnifica cha megl dra nu daja bod na
- davant quista modesta chasetta.

Che vaina da festagiar? Perche faina festa? Vaina insomma motiv da far festa?

Schi's fabricha üna chasa as faja festa. Ils patruns inaugureschan la reuschida da la fabrica. I's fa festa per cumanzar alch nouv in quella chasa. Forsa cha avant ün pèr tschient ons hana inaugurà quista chasa pel cumanzamaint da sia funcziun, nempe d'esser il lö ingio chi vain elavurà il lat a painch, chaschöl e tschigrun, e d'esser il lö ingio cha quella glied per ons ed anorums ha, per minch'on ün tschert temp, vivü, resp. abità. No festagiain hoz ün oter evenimaint. Eir no festagiain üna reuschida. A la Società d'Ütil public esa reuschi da dvantar proprietaria da quista tea! Quel fat laina inaugurar! Per no es quai motiv avuonda per far festa, perche no eschan persvas cha cun esser proprietaris da quista tea possna contribuir considerabelmaing a l'istorgia culturala da nos lö, resp. da nossa vallada.

I's tratta d'üna tea veglischna, però cumpletta i'l stadi oriund, q. v. d. cun local d'abitar e da chaschar, e dals duos schlers tradiziunals, quel dal lat e quel dal chaschöl. Simlas teas, tuottas cull'istessa structura, existivan in mincha cumün da nossa regiun in gronda quantità e faivan part cun quai in quella fuorma ed in quel möd a l'existenza da noss antenats, e quai per tschientiners dad ons a la lunga. Il svilup dal 20avel tschientiner cull'electricità, culs indrizs sanitaris d'aua, cullas lingias da lat e cun oters mezs da transport, insomma culla raziunalisaziun, ma eir cullas pretaisas d'igiena, ha fat la finida cullas teas veglias. I sun gnüdas renovadas e fabricadas intuorn, opür chi sun idas in malura.

Restada es, quai vaina constatà davo avair fat numersas retscherchas, almain per quai chi riguarda nossa regiun d'Engiadina Bassa, be amo üna – nempe la tea dal Prümarn Prà San Flurin sün Telf a Sent!

La Società d'Ütil public es perquai presvasa cha pro quist stabilimaint as tratta d'ün documaint regiunal istoric da gronda valor, chi sto in mincha cas gnir mantgnü, resp. chi stopcha gnir impedi chi vegna müdà sia funcziun chi'ns dà hoz perdüttanza da la veglia cultura da nossas alps.

Id es bain pussibel cha our in Surselva, our il Partens, o in oters lös as rechattan amo teas in stadi original. I's sto però savair cha la varietà da nos chantun Grischun d'eira da prüma innan avantman eir pro las alps. A Splügia, o in Lumnezia, o i'l Signuradi existiva üna cultura d'alp tuottafat differenta da nossa in Engiadina Bassa. I's tratta damaja da salvar ün toc cultura da la regiun. Na d'invidar es eir il fat cha'ls contuorns d'üna tea appartegnan pro l'istorgia d'alp. Il stavel, las vias veglias d'access, insomma l'ambaint ingio chi's rechatta la tea sun da grond'importanza. Tuot quai es quà avantman exemplaricamaing.

In vista al fat chi existiva forsà ün tschert privel cha la tea füss ida in mans chi nu vessan garanti l'existenza ventura in seis esser original, vaina decis illa Società d'Ütil public da provar da tilla acquistar.

Davo avair miss a disposiziun cun grond sacrifici agens mezs ill'otezza da 37'000.– frs. ans mancaivan 100'000.– frs. per pudair cumprar il stavel. La banca ans ha miss in vista üna ipoteka da 76'000. frs., damaja d'eira da gnir pro cun 24'000.– frs. Instituziuns e fundaziuns ans han bainschi impromiss considerabels

imports, però adüna premiss cha no sajan proprietaris. Quai es eir inclegiantaivel. I nu's po pretender da survgnir raps per ün stabilimaint chi appartegna ad inchün oter! Co far a gnir pro culs 24'000.– frs.? Davo diversas provas e dumondas vessna bod dat sü la spranza.

I s'ha lura annunzchà ün abitant da Sent pro mai e m'ha dit: „Eu sun stat a verer la tea. Eu sun da vos avis, cha quella stopcha gnir mantgnüda. Eu crai da rablar nan bain spert l'import chi's manca! Füssat perinclets sch'eu fess la prova?“

Natüralmaing cha no eschan stats perinclets.

Cun grond ingaschamaint e cun considerablas contribuziuns our da l'aigna buorsa ha'l, insembel cun sia parantella, seis vaschins e cuntschaints, ramassà l'import chi'ns mancaiva, e davo pac temp ans ha'l miss sün maisa ils 24'000 francs.

La radunanza extraordinaria da la Società d'Ütil public dals 4 october 2002 ha lura decis unanimamaing da lair cumprar la tea. Suot quel nouv aspet han cumanzà a cuorrer las donaziuns, ed in favrer vaina pudü suottascriver il contrat da cumprita! Hoz ans chargia amo ün'ipoteca da ca. 26'000.– frs., quai chi culs fits dad hoz es amo supportabel per ün tempet. No stuvain però cuntinuar cun ramassar.

L'ultim temp ans vaina però concentrats plütöst sün nossa festa dad hoz, chi dess muossar il plaschair cha no vain per quai raggiunt fin uossa. Però, sco dit, bainbod stuvaina cuntinuar cun dumondas d'agüd a la populaziun (quai cha fin uossa nu vaivna fat) e no sperain cha bainbod hajna insembel ün pitschen fuond per cumanzar alch lavurettas da mantegnimaint.

Adüna darcheu ans es gnüda fatta la dumonda: „Ma che faivat culla tea?“

La resposta es fich simpla:

- dvantar proprietaria (quai cha no eschan hoz)
- mantegner la tea e seis contuorns i'l stadi oriund
- metter a disposiziun la tea per la generalità, a tschertas uras fixadas
- ev. far demonstraziuns etc.
- chi sa, forse cha nossa tea survain ün di il nom: „museum d'alp“.

Ed uossa per finir rivaina amo pro'ls ingrazchamaints. Ouravant lessa dir ch'eu nu manzun las donaziuns persunalas da singuls, chi importas per part diversa milli francs per cas! Il motiv es quel cha no ans rechattain immez il temp, q. v. d., cha no fain quint amo cun diversas donaziuns. No faran lura a temp ütil üna glista e publicaran lura eir ils noms dals donatuors.

Sco excepziun però lessa istess nomnar üna persuna chi cun sia acziun in famiglia e pro vaschins e cuntschaints ans ha pussibilità il prüm pass:

Quai es dr. Erich Suter da Bögliet! A Tai Erich ün sincer ingrazchamaint.

Eu ingrazch plünavant:

- | | | |
|--|-----|----------|
| - a la protecziun da la patria, secziun „Vals dal süd“ | fr. | 2'000.– |
| - als musicants cun sar Holenstein | fr. | 720.– |
| - a la chüra da monumaints (M. Mathis) | fr. | 20'000.– |
| - a la fundaziun Giovannina Bazzi (N. Carl) | fr. | 5'000.– |
| - a la società Grischuna Bern (G. Breuleux-Vital) | fr. | 1'080.– |
| - a la fundaziun Bischofberger (R. Parli) | fr. | 3'000.– |
| - a la corp. cumüns conc. da las OEE (N. Carl) | fr. | 20'000.– |

Eu less ingrazchar a tuot chi chi's metta hoz a disposiziun per imbellir ed attribuir cha eir nossa festa reuschischa.

Ingrazchar lessa sco ultim ad Evar Benderer chi ha mantgnü sco fittadin da la tea quist stabel in preservont per bliers ons da la deruotta.

Stimats preschaints, as laschai inspirar da nossa tea. Eu as giavüsch üna bella festa e bun divertimaint.

il president:
Georg Buchli